

Sak 13-22

Endring av Forskrift for handsaming mv. av avfall og slamtøming, Volda og Ørsta kommunar. Orientering.

Tilråding:

Representantskapet tek orienteringssak om forskriftsending til vitande

Saksutgreiing

Bakgrunn for saka

Styret i VØR fekk i sak 36-22 framlagt ei sak vedkomande revisjon av den lokale renovasjonsforskrifta. Styret gjorde slikt vedtak:

«Styret ber om at administrasjonen iverkset ein prosess med full revisjon av forskrifta, med mål om deling i forskrift og retningslinjer. Styret ber om orientering om prosess- og framdriftsplan på neste styremøte.»

Bakgrunnen for saka er at kommunane har bedt VØR legge fram forslag til revisjon av den lokale forskrifta. Begge kommunestyra gjorde likelydande vedtak i desember 2022, der ein ber om at VØR greier ut spørsmålet om etablering av ein reparasjons- og gjenbrukssentral. I dag inngår ikkje ombruk i VØR sin formålsparagraf, så for at VØR skal kunne engasjere seg i slike saker, må denne endrast.

I tillegg til denne endringa i formålsparagrafen, erfarer administrasjonen at det er relativt mange andre punkt og formuleringar som må og bør endrast i forskrifta. Ein del av endringane har bakgrunn i nytt regelverk, rettspraksis og i føringar frå eigarkommunane. Men fleirtalet av endringane som bør gjerast, skuldast endra praksis, språklege forbetringar eller at ein har erfart behov for tydeliggjering. Forskrifta er oppbygd slik at den er særskild detaljert, med t.d. klar skildring av korleis renoveringa skal føregå. Dersom det skal gjerast endringar, må såleis forskrifta reviderast. Eitt døme er den endra praksisen med plastsekk på utsida av papirdunken, noko som difor inneber behov for forskriftsendring, slik det fungerer i dag. Det å gjennomføre ei offentleg høyring der mange små endringar skal gjerast i ei detaljert forskrift er ikkje lett å få korrekt og presist, særleg ikkje når mange av endringane er av språkleg karakter.

Dagens renovasjonsforskrift for Volda og Ørsta finn ein her:

<https://lovdata.no/dokument/LTI/forskrift/2019-09-05-2224>

Framgangsmåte ved revisjon av lokale forskrifter

Endring av lokal forskrift er ein formell og juridisk prosess som følgjer gitte retningslinjer. Lovendringar og rettspraksis sidan siste revisjon må innarbeidast i forskrifta, saman med nye pålegg frå overordna miljømynde. Likeins må vedtak i eigarkommunane og innspel frå VØR takast med i høyringsframlegget, som del av den demokratiske prosessen som ein revisjon av forskriftene er.

Praksis ved tidlegare revisjonar har vore at VØR samlar innspela, gjennomgår dei og sender dei over til kommunane. Så er det kommunane som gjennomfører den juridiske forskriftsprosessen, sidan det er kommunane som har legalitet til det.

Endring av forskriftene er å etablere ny lov for renovasjonsområdet. For å vere gjeldande må arbeidet følgje forvaltningslova sine reglar for utarbeiding av forskrift. Det inneber følgjande prosess:

1. saksutgreiing og innstilling frå VØR
2. høyring av forslaget til endra forskrift
3. kommunen sine kommentarar til merknadane
4. tilråding til og vedtak i kommunestyra
5. kunngjering i Lovtidende

Alternativ til revisjon av enkeltpunkt

Ein del renovasjonsselskap har ei enklare løysing enn å samle alt i forskrift. Dei har gjerne ei relativt kortfatta forskrift som gir rammene for renovasjonsordninga, og i tillegg har ein så retningslinjer eller ein tenestebeskrivelse, der ordningane vert detaljerte. Døme på slike finn ein hos Innherred Renovasjon og hos RIR:

<https://innherredrenovasjon.no/om-oss/regelverk/#-tjenestebeskrivelse->

<https://www.rir.no/om-rir/selskapsavtale-og-forskrifter>

Fordelen med eit slikt todelt regelverk, er at det er enklare å gjere driftsmessige endringar ved ei slik deling. Styret i VØR har fullmakt til å lage slike retningslinjer, og det er såleis ikkje trong for tid- og arbeidskrevande forskriftsendringar. Vi registrerer at det stadig kjem nye nasjonale regelendringar, og dette vil vedvare. Ei todeling av regelverket vil gjere det raskare og enklare å implementere slike endringar. Vi veit td at det kjem nytt regelverk knytt til tekstilar, og at «pay-as-you-throw»-prinsippet vert vurdert av MD no, og vil evt vere gjeldande frå 2025. Men først og fremst er det behovet for å kunne gjere mindre språklege og driftsmessige endringar utan forskriftsprosess, som synest å vere fordelene.

Vidare arbeid og konsekvens

Ei utfordring med ei slik omarbeiding av heile forskrifta og utarbeiding av separate retningslinjer, er at dette er arbeidskrevande for administrasjonen. Det er vanskeleg å estimere kor lang tid og kor mykje ressursar ein treng til ein slik prosess, men dei administrative ressursane er som kjent begrensa. Det vil truleg vere trong for å knyte til seg noko juridisk kompetanse i revisjonsarbeidet. Ein førebels plan er oppstart av arbeidet på nyåret, ferdig utkast til juni, kommunal handsaming og høyring i 2.halvår og verknad frå 01.01.2024.

Ein full revisjon vil også innebere at formålsparagrafen ikkje vil bli endra heilt enno, slik kommunane har bede om. Mandatet frå eigarkommunane er likevel så sterkt, at ein anser det som uproblematisk at VØR startar utgreiingsarbeidet iht ombruk før heimelen formelt er forskriftsfesta.

Ein annan konsekvens av slik todeling i forskrift og retningslinjer, er at ein avgrensar kommunestyra sitt høve til detaljstyring. Det vil skje ein overgang der eigar i større grad styrer etter rammer; i praksis gjennom ei mindre detaljert forskrift. I neste runde vert det så opp til VØR sitt styre å utforme og tilpasse dei operative tenestene på grunnlag av det, gjennom retningslinjer eller ei tenesteskildring. Dette er ei framtidsretta løysing, der tenestene og verksemda lettare og raskare kan tilpassast endringar og erfaringar.

I saka vidare vert dei mest vesentlege og relevante forskriftsendringane gjennomgått og drøfta, slik det opprinneleg vart planlagt gjort gjennom ordinær forskriftsrevisjon.

Til sist i dokumentet er endringsframlegga samla og innarbeidde i forskriftsteksta.

Aktuelle endringar i denne forskriftsrevisjonen

I denne saka vert endringsforslaga handsama i denne rekkefølga:

1. tilhøve som er knytt til lov og konsekvensar av lov
2. innspel frå kommunane
3. endringsforslag frå VØR

ENDRING 1: KONSEKVENSAAR AV RETTSKRAFTIG DOM / LOVTOLKING

I rettskraftig dom frå Eidsiva Lagmannsrett datert 08.02.2022 vert det slått fast at utleigehytter skal vere underlagt tvungen renovasjon, og ikkje vere næringsrenovasjon.

Dette er annleis enn det VØR har lagt til grunn fram til no. VØR ser det slik at gjeldande rett bør inn i dei lokale forskriftene. Dei lokale forskriftene kan ikkje endre gjeldande rett, men det er i forskriftene dei fleste vil leite etter kva som gjeld til ei kvar tid. Så av pedagogiske omsyn bør alt vere samla der og i samsvar med rettspraksis.

VØR foreslår at endringa vert teken inn i noverande § 3a, 9.ledd gjennom tillegg av følgjande formulering: «Fritidsbustad omfattar og utleigehytter.» Merk at det i Endringsforslag 3F er føreslege ytterlegare tillegg til dette punktet.

ENDRING 2: Nye og endra tiltak foreslått frå eigarkommunane

Endring 2A: Ombruk inn i formålsparagrafen

Kommunestyra vedtok i desember 2021 å be VØR greie ut etablering av reparasjons- og gjenbrukssentral. Vedtaka i dei to kommunestyra var likelydande:

«Kommunestyret ber VØR, i samarbeid med administrasjonane i eigarkommunane, ta initiativ til eit pilotprosjekt med tanke på å greie ut etablering av ein reparasjons - og gjenbrukssentral i Volda/ Ørsta, til dømes etter modell frå Resirkula på Hamar.»

VØR hadde møte med ordførarane og kommunedirektørane om oppfølging av dette vedtaket. I forskriftene vedtekne i 2019, er det ikkje høve til å gebyrfinansiere tilrettelegging for ein reparasjons -og gjenbrukssentral. Konklusjonen i møtet var difor at VØR skulle førebu forslag til forskriftsendring, slik det går fram av denne saka.

Dersom ein ynskjer å utvide VØR sitt mandat, må forskriftene for renovasjon og slam § 2, endrast. Det kan ikkje vere motsetnad mellom forskriftene og dei oppgåvene VØR skal utføre og finansiere.

I dag lyder § 2, 1. ledd i forskrift for renovasjon i Volda og Ørsta kommunar slik:

§ 2. Virkeområde

«Denne forskrifta gjeld kjeldesortering, oppsamling, innsamling og transport av alle typar avfall og slam som kommunane sjølvpålagt, etter forureiningslova eller ved delegering frå overordna forureiningsmynde, er tillagt mynde over. Dette inkluderer farleg avfall frå hushaldningar og bedrifter dersom mengda ikkje overstig den grensa som til ei kvar tid gjeld i avfallsforskrifta.»

Forskrifta opnar såleis ikkje opp for anna enn det Forureiningslova definerer som oppgåve, og det er avfall.

I vedtaket frå kommunestyra er det synt til Resirkula på Hamar. Resirkula er ombruksbutikkane som Sirkula IKS har vore ein tilretteleggar for, med eit eige bygg som dei leiger ut. Sirkula IKS er renovasjonsselskapet for Hamar regionen. I Forskrift om renovasjon for husholdningsavfall, Hamar, Løten, Ringsaker og Stange kommuner, omfattar formålsparagrafen til avfallsverksemda tilrettelegging for ombruk.

Utdrag frå forskrifta til Sirkula IKS:

«Forskriften har som formål å sikre at lovpålagte plikter i tilknytning til husholdningsavfall oppfylles med en miljøvennlig, kostnadseffektiv og helsemessig forsvarlig renovasjonsordning for innbyggerne i Hamar, Løten, Ringsaker og Stange kommuner.

Forskriften skal stimulere til lavest mulig avfallsproduksjon og hindre forsøpling, bl.a. ved å tilrettelegge for ombruk og materialgjenvinning.

Forskriften skal tilrettelegge for en best mulig ivaretagelse av kommunens mål og strategier slik disse er nedfelt i kommunens avfallsplan.»

Det er verd å merke seg at forskrifta til Sirkula IKS opnar for tilrettelegging for ombruk. Reint praktisk skjer det i eit eige bygg som dei har bygt og leiger ut, med ei redusert husleige for butikkane i inntil tre år. Då skal verksemda vere sjølvfinansierande. Butikkane driv med sal av ordinære artiklar, men har plikt til også å drive med ein viss del sal av ombruksartiklar og reparasjon av andre artiklar.

Det er viktig å hugse på at Sirkula IKS eller VØR IKS ikkje har høve til å delta i regulær handel med varer som er finansiert av renovasjonsgebyret. Ombruk og reparasjon er pr. definisjon varehandel / tenestekjøp - ikkje avfall.

Vi meiner det er naturleg å ta kommunestyra sin vilje inn i forskriftene. Vi foreslår derfor at Hamar, Løten, Ringsaker og Stange kommunar sine formuleringar i formålsparagrafen vert innarbeidde i framlegg til ny § 1 i Volda og Ørsta si forskrift. Dagens formulering går ut. Ny § 1 blir såleis lydande:

Forskrifta har som formål å sikre at lovpålagde plikter i tilknytning til hushaldsavfall vert følgt opp med ei miljøvennleg, kostnadseffektiv og helsemessig forsvarleg renovasjonsordning for innbyggjarane i Volda og Ørsta kommunar.

I §2 Virkeområde vert det gjort følgande tillegg som nytt 2.ledd:

Forskrifta skal stimulere til lavast mogleg avfallsproduksjon og hindre forsøpling, ved å legge til rette for ombruk og materialgjenvinning.

Endring 2B: Vurdering av nytt abonnement for småhushald

Hornindal kommune hadde fram til samanslåinga i 2019 ein abonnementsstype i gebyrforskrifta for husstandar som omfatta med ein person. Denne ordninga vart drøfta i samband med samanslåing av kommunane Volda og Hornindal. Saksutgreiinga frå 2019 lyder slik:

«Dette var eit tema i Volda og Ørsta rundt 1999, i samband med Avfallsplanen 1999-2003 som kommunestyra den gangen vedtok. Konklusjonen vart ei inndeling slik vi fortsatt har det, der ein gjekk bort frå ein type abonnement likt for alle (52 sekkar pr år), og innførte eit gebyrsystem der hentefrekvens, samarbeid og storleik på behaldarar var virkemiddel for å

stimulere til redusert avfallsproduksjon. Dette femnde om alle eigedomar utan omsyn til tal personar i husstandane.

Ein person husstandar kunne velje den sjeldnaste hentefrekvensen og dei minste behaldarane på same måte som dei familieane som var flinke å sortere.

Ordning basert på tal personar i gebyreininga vart vurdert, men gått vekk frå. Personvern-grunnar var eitt argument som var brukt. Objektive kriterie for å stimulere til låg avfallsproduksjon for alle, var eit anna argument. Enkle kontrollregimer for å sikre at dei som skal betale faktisk gjer det, var eit tredje argument.

I 2018 fekk vi ny personvernlov. Intensjonen i lovverket er å sikre enkeltindividet sine rettar betre enn før, og helst avgrense mest mogeleg at «storebror ser deg». Vi meiner at å innføre ein person abonnement med påfølgjande kontrollregime ikkje er eit skritt i den retning. Vår tilråding er å vidareføre Volda og Ørsta kommunar sitt abonnementsystem som stimulerer til redusert avfallsproduksjon ved samarbeid om oppsamlingseining og storleik på behaldarar.»

Slik vart det vedteke og forskriftene vart samrøystes godkjende i begge kommunestyra.

VØR si vurdering er framleis at innretninga på dagens gebyrsystem **ikkje bør endrast**. Bakgrunnen for det er omsynet til ny personvernlovgeving og utfordringane knytte til at ei slik ordning er vanskeleg å kontrollere mtp kven som bur kvar. VØR meiner likevel at eit alternativ med småhushaldsabonnement for dei med små avfallsmengder kan vurderast i høyringa. Ei innføring av slik ordning inneber at det må skaffast inn ytterlegare ein type dunkar. I tillegg er transportkostnaden med henting den same uansett storleik på dunken.

Framlegg til ny § 3a, 1. ledd:

Småhushaldsabonnement er abonnement med 1 stk. 80 l avfallsdunk for våtorganisk avfall (matavfall) med henting kvar 2. veke, 1 stk. 80 l avfallsdunk til restavfall med henting kvar 4. veke, 1 stk. 140 l avfallsdunk til papp, papir og drikkekartong, plast i eigen returplastsekk med henting kvar 4. veke og 1 stk. 80 l avfallsdunk for glas og metalleballasje med henting kvar 13.veke. 1 stk. raud boks for farleg- og elektrisk/elektronisk avfall.

3. Endringar foreslått av VØR

Endring 3A – definisjon fritidsbustad i §3b

I samband med innføringa av tvungen hytterenasjon, har VØR erfart at det er trong for nokon språklege endringar og korrigeringar i §3b. Dette gjeld:

- utviding av definisjonen på fritidsbustad
- korrigering av skrivefeil i høve til kven som kan levere avfall
- endra nemning av type fritidshus til det generelle omgrepet «fritidsbygg»

Noverande §3b, 1.ledd:

Fritidsbustad er husvære utan fast busetnad, som ikkje vert brukt over 4 månader i året. Ein kan ikkje ha fast bustadadresse ved eigedomen. Fritidsbustad er ikkje omfatta av § 10 c og d i denne forskrift. Abonentar til kategori 1–4 leverer sitt avfall til felles oppsamlingspunkt for fritidshusrenovasjon.

Framlegg til ny §3b, 1.ledd:

Fritidsbustad er husvære utan fast busetnad tilrettelagt for opphald og kvile, som ikkje vert brukt over 4 månader i året. Ein kan ikkje ha fast bustadadresse ved eigedomen. Fritidsbustad er ikkje omfatta av § 10 c og d i denne forskrift. Abonentar til kategori 1–3 leverer sitt avfall til felles oppsamlingspunkt for fritidshusrenovasjon.

I alle kategori-omtalane i §3b vert alle nemningane på dei ulike bygningstypene vert erstatta med nemningane «Fritidsbygg og bustadhus der det ikkje er fastbuande»

Endring 3B – levering av plast

Det er ikkje samsvar mellom forskrifta og korleis levering av plastemballasje skal gå føre seg i praksis idag. Det må korrigerast, og VØR foreslår derfor endring i §3.

Dagens §3d, 9.ledd lyder slik i dag:

Returplast er plastemballasje som kan gå til attvinning i eigen returplastsekk som VØR leverar ut kvart år til alle abonentar.

Ny §3d, 9.ledd:

Plastemballasje er plast som kan gå til attvinning. Slik plast leverast i eigen returplastsekk som VØR deler ut. Returplastsekken skal plasserast på eigen krok på papirbeholdar på hentedagar eller leverast miljøstasjonen.

Endring 3C – nedgravne avfallsanlegg

I tilknytning til konsentrerte bustadutbyggingar, vert det gjerne etablert nedgravne avfallsanlegg, noko som erstattar dei tradisjonelle plastdunkane. Det har vore ein jamn auke i slike anlegg, og VØR har erfart at det er trong for klarare regelverk rundt eigenskapar og utforming av desse anlegga. Ansvarsdelinga er at utbyggar etablerer anlegga, og at VØR så overtek dei når dei er ferdigstilt. VØR har opplevd vesentlege manglar knytt til at dei nedgravne anlegga ikkje er monterte som dei skal, dei har annleis tømekanisme enn det VØR nyttar eller dei er ikkje førebudde med tilgangskontroll og nivåmåling for å unngå overfylling og misbruk. Dette har t.d. resultert i brønner som fyller seg med vatn, slik at avfallet får høg vekt og eller vert øydelagt. Konsekvensen er ekstrakostnader for VØR for å få ting i orden, unødig tidsbruk og auka driftskostnader. Desse erfaringane, saman med at dei fleste utbyggarane av konsentrerte bustadområde vel nedgravne anlegg, gjer at VØR no ser trong for å tydeleggjere vilkåra i samband med bygging og overtaking.

Noverande §3e, 1.ledd:

Avfallsbeholdar/avfallsdunk/fellescontainer/nedgravne anlegg er ei oppsamlingseining for avfall som VØR stiller til rådvelde for abonnentane. VØR kjøper, leverer ut og eig avfallsbeholdarane. VØR skiftar ut avfallsbeholdarane når det er naudsynt. Nedgraven løysing føreset avtale med VØR, jf. § 2 tredje ledd.

VØR foreslår at §3e, 1.ledd vert endra til:

Avfallsbeholdar / avfallsdunk / fellescontainer / nedgrave anlegg er ei oppsamlingseining for avfall som VØR stiller til rådvelde for abonnentane. VØR kjøper, leverer ut og eig avfallsbeholdarane. VØR skiftar ut avfallsbeholdarane når det er naudsynt. Nedgraven løysing føreset at det på førehand vert inngått avtale med VØR om vilkåra, jf. § 2, 3. ledd. Ved overtaking skal det gjennomførast overtakingsforretning.

Endring 3D – språkleg klargjering av klagerett

Forskrifta har nokon punkt der det er trong for klarare språk for å unngå mistydingar. Dette gjeld mellom anna i §11, 1.ledd:

Noverande §11, 1.ledd:

Søknader om unntak og klager på praktiseringa av denne forskrift, kan påklagast (forvaltningslova § 2 b og [forureiningslova § 85](#)). Klagen skal sendast til det organet som har gjort vedtaket. Dersom klagen ikkje vert teken til følge, vert den sendt til styret for VØR, som skal gjere endeleg vedtak.

VØR foreslår at §11, 1.ledd vert endra til:

Vedtak som er gjort med heimel i denne forskrifta er enkeltvedtak og kan påklagast, jf Forvaltningslova §2b og Forureiningslova §85. Eventuell klage på enkeltvedtak sendast til VØR. Dersom klagen ikkje vert teken til følge, vert den sendt til styret for VØR, som gjer endeleg vedtak.

Endring 3E – tømefrekvens for slamavskiljarar

VØR er kjent med at det i Grendadalen i Hornindal ikkje er løyve til å legge inn vatn i fritidshusa, jfr reguleringsføresegnene for området, men at det er gitt utsleppsløyve til tett tank. I mange andre kommunar er praksis for slike hytter tøming av tanken 2. kvart år. For hyttene i dette spesifikke området har VØR også praktisert slik tøming 2.kvart år, medan §14b i gjeldande forskrift fastset at alle tette tankar skal tømast årleg. Denne praksisen bør no innarbeidast i forskriftene, og VØR foreslår følgjande endring:

Noverande §14b:

Tvungen slamtøming gjeld for alle eigedomar som har slamavskiljar eller tett tank for slam. For eigedomar med fast busetjing/heilårsbustad og med toalett tilknytt slamavskiljar, skal slamavskiljar tømast ein gong kvart andre år. Andre slamavskiljarar skal tømast ein gong

kvart fjerde år. Tette oppsamlingstankar skal tømast i god tid før dei er fulle og minst ein gong kvart år. I særlege høve kan VØR fastsetje annan tømefrekvens enn nemnt ovanfor.

VØR foreslår at §14b vert endra til:

Tvungen slamtøming gjeld for alle eigedomar som har slamavskiljar eller tett tank for slam. For eigedomar med fast busetjing/heilårsbustad og med toalett tilknytt slamavskiljar, skal slamavskiljar tømast ein gong kvart 2. år. Andre slamavskiljarar skal tømast ein gong kvart 4. år. Tette oppsamlingstankar skal tømast i god tid før dei er fulle og minst ein gong kvart år. For eigedomar utan innlagt vatn skjer tøming av tett tank annakvart år. I særlege høve kan VØR fastsetje annan tømefrekvens enn nemnt ovanfor.

Endring 3F – Gebyrplikt for fast monterte campingvogner med telt /platt større enn 20 kvm

I tidlegare Hornindal kommune si renovasjonsforskrift hadde fast monterte campingvogner med spikertelt utanom campingplass gebyrplikt. I samband med revisjonen av forskriftene frå 2019 for Ørsta og Volda, vart ikkje dette vidareført. Frå VØR si side vart det den gangen vektlagt at utleigehytter og fast monterte campingvogner var ein del av næringsverksemda til campingplassane. Fast monterte campingvogner med spikertelt utanfor regulerte campingplassar hadde eit svært lågt omfang, og i eit kost-nytte perspektiv såg ein ikkje det som bryet verdt å kartlegge og følgje med på.

Som omtalt under Endring 1, slår rettskraftig dom no fast at alle utleigehytter skal vere underlagt tvungen renovasjon. I lys av dette meiner VØR at dette endrar vurderinga i høve til faste campingvogner. Eit anna moment er at det offentlege må sette likebehandling høgt. I dagens forskrift § 3b, kategori 3, er alle fritidseigedomar større enn 20 kvm BRA pålagt gebyr. Dei aller fleste fastmonterte campingvognene med spikertelt er større enn 20 kvm, og det framstår difor ikkje som likebehandling at desse ikkje skal vere underlagt tvungen renovasjon.

Romsdalshalvøya Interkommunale Renovasjonsselskap (RIR) har innarbeidd dette i si renovasjonsforskrift, §3-2: *I utgangspunktet omfattes alle boliger og all fritidsbebyggelse av ordningen med tvungen innsamling av husholdningsavfall og er dermed gebyrpliktig i henhold til denne forskrift. Gebyrplikten omfatter også permanente oppsatte campingvogner.*

Også Innherred Renovasjon (IR) har etablert ei ordning der faste campingvogner vert underlagt tvungen renovasjon:

§ 2-3. Forskriften gjelder for permanent oppsatt campingvogn. Med permanent menes her oppstilling på samme oppstillingsområde i 4 måneder eller mer. Campingvogn plassert på lagerplass blir ikke regnet som permanent oppstilt den tiden den står på lager og det kan dokumenteres at den ikke er i bruk.

Regulerte campingplasser med permanent oppsatte campingvogner inngår også i ordningen. IR IKS skal – med utgangspunkt i reguleringsbestemmelsene og i samarbeid med grunneier – bestemme hvor mange campingvogner som kommer innunder ordningen.

IR arbeider no med ei endring av denne forskrifta, der definisjonen på permanent vert sett til 3 mnd permanent opphald. I praksis fungerer ordninga slik at der vognene står på ein campingplass, vert det etablert eit samarbeid med campingplassen både på innsamlingsutstyr / container og innbetaling av gebyr. I tillegg til renovasjonsordninga på campingplassen, får også vogneigaren tilgang til å levere ved den lokale miljøstasjonen.

Av omsyn til likehandsaminga, rår VØR til at også fastmonterte campingvogner inkludert spikertelt over 20 kvm. vert underlagt tvungen renovasjon. Heimel for dette vert forslått innarbeidd i noverande § 3a, 9. ledd. Saman med tillegget som er føreslege i Endring 1, vert §3a, 9.ledd føreslege slik:

§3a, 9.ledd:

Fritidsbustad er abonnement for dei med fritidshusvære, enten dei har eigen avfallsbeholdar eller må levere avfallet i samlebeholdar for fritidshus/hytter. Fritidsbustad omfattar og utleigehytter og permanent oppsett campingvogn med samla areal over 20 kvm, inkl spikertelt. Med permanent er her meint oppstilling på same oppstillingsområde i 3 månader eller meir. Campingvogn plassert på lagerplass blir ikkje rekna som permanent oppstilt den tida den står på lager og det kan dokumenterast at den ikkje er i bruk. Regulerte campingplassar med permanent oppsette campingvogner inngår også i ordninga.

Tillegg til §3b, 1.ledd:

VØR skal – med utgangspunkt i reguleringsvedtektene og i samarbeid med grunneigar – avgjere kor mange campingvogner som kjem inn under ordninga.

Endringsframlegg til

Forskrift for handsaming mv. av avfall og slamtøming, Volda og Ørsta kommunar, Møre og Romsdal

Heimel: Fastsett av Ørsta kommunestyre i sak 54/19 5. september 2019 og Fellesnemnda for nye Volda i sak 37/19 18. juni 2019 med heimel i lov 13. mars 1981 nr. 6 om vern mot forurensningar og om avfall (forurensningsloven) § 30, § 31, § 34, § 79 og § 83.

Kapittel 1

§ 1. Mål for avfallssektoren

Forskrifta har som formål å sikre at lovpålagde plikter i tilknytning til hushaldningsavfall vert følgd opp med ei miljøvennleg, kostnadseffektiv og helsemessig forsvarleg renovasjonsordning for innbyggjarane i Volda og Ørsta kommunar.

Går ut: Forskrifta har som mål å arbeide for at avfall som oppstår vert handsama på ein trygg, kostnadseffektiv og miljørett måte i samsvar med nasjonal avfallspolitikk.

§ 2. Virkeområde

Denne forskrifta gjeld kjeldesortering, oppsamling, innsamling og transport av alle typar avfall og slam som kommunane sjølvpålagt, etter forureiningslova eller ved delegering frå overordna forureiningsmynde, er tillagt mynde over. Dette inkluderer farleg avfall frå hushaldningar og bedrifter dersom mengda ikkje overstig den grensa som til ei kvar tid gjeld i avfallsforskrifta.

Forskrifta skal stimulere til lavast mogleg avfallsproduksjon og hindre forsøpling, ved å legge til rette for ombruk og materialgjenvinning.

Denne forskrifta omfattar alle registrerte grunneigedomar i Volda og Ørsta, inklusiv kvar enkelt seksjonerte del av bygning og kvar enkelt sjølvstendige brukseining i bygning. Også fritidseigedommar.

VØR avgjer i tvilstilfelle kva som reknast som sjølvstendig brukseining i bygning. VØR kan gi nærare retningslinjer for gjennomføring av avgjerdene i forskrifta.

§ 3. Definisjonar

a) Abonnement

Småhushaldsabonnement er abonnement med 1 stk. 80 l avfallsdunk for våtorganisk avfall (matavfall) med henting kvar 2. veke 1 stk. 80 l avfallsdunk til restavfall, med henting kvar 4. veke og henting av 1 stk. 140 l avfallsdunk til papp, papir, drikkekartong. Plastemballasje i eigen returplastsekk festa på krok, kvar 4. veke og henting av 1 stk. 80 l avfallsdunk for glas og metallemballasje kvar 13 veke. 1 stk. raud boks for farleg- og elektrisk/elektronisk avfall.

Standard er abonnement med 1 stk. 140 l avfallsdunk for våtorganisk avfall (matavfall) med henting kvar 2 veke 1 stk. 140 l avfallsdunk til restavfall, med henting kvar 4. veke og henting av 1 stk. 140 l avfallsdunk til papp, papir, drikkekartong. **Plastemballasje i eigen returplastsekk, kvar 4. veke** og henting av 1 stk. 140 l avfallsdunk for glas og metallemballasje kvar 13 veke. 1 stk. raud boks for farleg- og elektrisk/elektronisk avfall.

Standard pluss er abonnement med 1 stk. 140 l avfallsdunk for våtorganisk avfall (matavfall) med henting kvar 2. veke 1 stk. 140 l avfallsdunk til restavfall, med henting kvar 4. veke og henting av 1 stk. 240 l avfallsdunk til papp, papir, drikkekartong. . **Plastemballasje i eigen returplastsekk festa på krok, kvar 4. veke** og henting av 1 stk. 140 l avfallsdunk for glas og metallemballasje kvar 13. veke. 1 stk. raud boks for farleg og elektrisk/elektronisk avfall.

Kompostering er abonnement der det ligg føre særskild kontrakt med VØR om kompostering av alt våtorganisk og hageavfall som oppstår hos abonnenten. Slike abonnement har 1 stk. 140 l avfallsdunk til restavfall, med henting kvar 4. veke og henting av 1 stk. 140 l avfallsdunk til papp, papir, drikkekartong. **Plastemballasje i eigen returplastsekk festa på krok, kvar 4. veke** og henting av 1 stk. 140 l avfallsdunk for glas og metallemballasje kvar 13. veke. 1 stk. raud boks for farleg- og elektrisk/elektronisk avfall.

Kompostering pluss er abonnement der det ligg føre særskild kontrakt med VØR om kompostering av alt våtorganisk og hageavfall som oppstår hos abonnenten. Slike abonnement har 1 stk. 140 l avfallsdunk til restavfall, med henting kvar 4. veke og henting av 1 stk. 240 l avfallsdunk til papp, papir. **Plastemballasje i eigen returplastsekk festa på krok, kvar 4. veke** og henting av 1 stk. 140 l avfallsdunk for glas og metallemballasje kvar 13. veke. 1 stk. raud boks for farleg- og elektrisk/elektronisk avfall.

Storhushald er abonnement med 1 stk. 140 l avfallsdunk for våtorganisk avfall (matavfall) med henting kvar 2 veke, 1 stk. 240 l dunk til restavfall, med henting kvar 4. veke og henting av 1 stk. 240 l avfallsdunk til papp, papir. **Plastemballasje i eigen returplastsekk festa på krok, kvar 4. veke** og henting av 1 stk. 140 l avfallsdunk for glas og metallemballasje kvar 13. veke. 1 stk. raud boks for farleg og elektrisk/elektronisk avfall.

Storhushald pluss er abonnement med 1 stk. 140 l avfallsdunk for våtorganisk avfall (matavfall) med henting kvar 2 veke, 1 stk. 240 l dunk til restavfall, med henting kvar 4. veke og henting av 1 stk. 340 l avfallsdunk til papp, papir, drikkekartong. **Plastemballasje i eigen returplastsekk festa på krok, kvar 4. veke** og henting av 1 stk. 140 l avfallsdunk for glas og metallemballasje kvar 13. veke. 1 stk. raud boks for farleg- og elektrisk/elektronisk avfall.

Samarbeid er abonnement med felles behaldar for våtorganisk avfall med henting kvar 2. veke, restavfall kvar 4. veke, papiravfall kvar 4. veke. **Plastemballasje i eigen returplastsekk festa på krok, kvar 4. veke** og glas og metall emballasje kvar 13. veke. Abonentane kan velje mellom ulike storleikar av behaldarar. Kravet for å inngå delingsavtale er at eigedomane er naboar eller ligg i nærleik til kvarandre og at abonnentane seg imellom har avtale om reinhald og framsetting av dunkane. Ved tvil vert dette avgjort av VØR. Dei samarbeidande partane har 1 stk. raud boks for farleg og elektrisk/elektronisk avfall kvar.

Nedgrave fellesrenovasjon er abonnement med oppsamling av avfall i nedgravne containerar. **Før det kan gåast inn avtale om å etablere nytt nedgrave anlegg, må det på førehand skrivast avtale med VØR om vilkåra for overtaking. Det skal gjennomførast formell overtakingsforretning ved overtaking**

Fritidshus er husvære utan fast busetnad tilrettelagt for opphald og kvile, som ikkje vert brukt over 4 månader i året. Ein kan ikkje ha fast bustadadresse ved eigedomen. Fritidshus omfattar også utleiehytter og permanent oppsett campingvogn med samla areal over 20 kvm, inkl spikertelt. Med permanent er her meint oppstilling på same oppstillingsområde i 3 månader eller meir. Campingvogn plassert på lagerplass blir ikkje rekna som permanent oppstilt den tida den står på lager og det kan dokumenterast at den ikkje er i bruk. Regulerte campingplassar med permanent oppsette campingvogner inngår også i ordninga.

Fritidshus kan ha eigen avfallsbeholdar eller levere avfallet i samleavfallsbeholdar for fritidshus/hytter, der avfallet skal sorterast.

Henteavtale er avtale mellom abonnent og VØR om henting, tøming og tilbakesetting av avfallsdunk på avstandar utover vegkanthenting.

b) Abonnementteining

Fritidshus er husvære utan fast busetnad tilrettelagt for opphald og kvile, som ikkje vert brukt over 4 månader i året. Ein kan ikkje ha fast bustadadresse ved eigedomen. Fritidshus er ikkje omfatta av § 10 c og d i denne forskrift. Abonentar til kategori 1–3 leverer sitt avfall til felles oppsamlingspunkt for fritidshusrenovasjon. Fritidshus med eigen avfallsbeholdar vert rekna som standardabonnement.

Kategori 1 (høg sats. 50 % av gebyr renovasjon standard)

Fritidsbygg og bustadhus der det ikkje er fastbuande, og som oppfyller alle 3 kriteria:

- a. Innlagt straum,
- b. vatn og avlaup,
- c. **Område med veg** som er køyrbar heile året eller båtbygge.

Kategori 2 (middels sats. 30 % av gebyr renovasjon standard)

Fritidsbygg og bustadhus der det ikkje er fastbuande, og som ikkje fell inn under kategori 1, 3 eller 4 og som oppfyller minst eit av kriteria i kategori 1.

Campingvogner med spikertelt. VØR skal – med utgangspunkt i reguleringsvedtektene og i samarbeid med grunneigar – avgjere kor mange campingvogner som kjem inn under ordninga.

Kategori 3 (låg sats. 10 % av gebyr renovasjon standard)

Fritidsbygg og bustadhus der det ikkje er fastbuande, som er større enn 20 m² BRA, og som ikkje oppfyller nokon av kriteria i kategori 1, 2 eller 4.

Kategori 4 (fritekne)

Fritidsbygg mindre eller lik 20 m² BRA.

Huseigar kan søkje VØR om varig fritak for hus som står til nedfalls.

Gebyreining/brukseining er husvære som er bygd eller ombygd til bruk for ein eller fleire personar og som har eigen inngang. Husværet kan anten vere leilegheit eller hybel. Ei gebyreining er ei leilegheit med fleire bruksrom dvs. minst eit rom og kjøkken (eventuelt tekjøggen) og eigen inngang.

Hybel er ½-gebyreining/brukseining og er husvære utan kjøkken og er eit rom med eigen inngang, der det er tilgang til vatn og toalett.

c) *Abonment*

Abonment er eigar eller festar av eigedom som er tilslutta den kommunale renovasjonsordninga jf. forureiningslova § 34, fjerde ledd. Leigetakar/brukar av eigedom kan unntaksvis stå som abonnent/rekningsmottakar dersom dette vert avtalt mellom VØR og eigar. Eigaren er likevel økonomisk ansvarleg for uteståande gebyr leigetakaren/brukaren måtte ha overfor kommunen. Dersom eigedomen er festa vekk for minst 30 år, eller i dei høva festet kan forlengjast utover 30 år, skal festaren reknast som abonnent.

Leigetakar/brukar: Dersom leigetakar/brukar og abonnent ikkje er same juridiske person, er leigetakar/brukar sine plikter dei same som abonnenten sine plikter, med unnatak av det økonomiske forholdet til VØR.

d) Avfall

Avfall er lausøyregjenstandar og stoff som skal regnast som avfall i høve forureiningslova sin § 27 og Miljødirektoratet, heretter kalla MD sin vegleiar TA-2001/2003.

EE avfall (elektrisk og elektronisk avfall): Kasserte ee-produkt, det vil seie produkt som er avhengig av elektrisk straum eller elektromagnetiske felt for korrekt funksjon. MD avgjer i tvilstilfelle kva som er ee-produkt, jf. avfallsforskrifta kap 1.

Farleg avfall (tidligere spesialavfall): er avfall som det ikkje er føremålstenleg å handtere saman med hushaldningsavfall eller næringsavfall fordi det kan medføre alvorleg forureining eller fare for menneske eller dyr. Døme på helse- og miljøfarleg avfall kan vere maling, spillolje, løysemiddel, plantevernmiddel og bilbatteri, jf. forureiningslova § 27a tredje ledd og avfallsforskrifta kap. 11.

Glas og metallemballasje: Glas eller metallemballasje frå hushaldningar.

Grovavfall, sjå restavfall.

Hushaldningsavfall er vanleg avfall frå private hushaldningar, medrekna større gjenstandar som inventar og liknande frå hushaldningar og fritidsbustader, jf. forureiningslova § 27 andre ledd og MD sin vegleiar TA-2001/2003.

Kompostering er biologisk nedbryting og stabilisering av organisk avfall med lufttilgang der restproduktet vert jord.

Næringsavfall er avfall frå offentlege og private verksemder og institusjonar, jf. forureiningslova § 27 tredje ledd og MD sin vegleiar TA-2001/2003.

Endra punkt: Plastemballasje er plast som kan gå til attvinning. Slik plast leverast i eigen returplastsekk som VØR deler ut. Returplastsekken skal plasserast på eigen krok på papirbeholdar på hentedagar eller leverast miljøstasjonen.

Restavfall er avfall som vert igjen etter kjeldesortering eller sentralsortering av hushaldnings- eller næringsavfall.

Risikoavfall er sprøytespissar, bandasjar og anna smittefarleg avfall frå helseinstitusjonar/kontor mv.

Våtorganisk avfall er lett nedbrytbart avfall av animalsk eller vegetabilsk opphav, slik som matavfall, hageavfall og planterestar.

e) Oppsamlingseining

Avfallsbeholdar / avfallsdunk / fellescontainer / nedgrave anlegg er ei oppsamlingseining for avfall som VØR stiller til rådvelde for abonnentane. VØR kjøper, leverer ut og eig avfallsbeholdarane. VØR skiftar ut avfallsbeholdarane når det er naudsynt. Nedgraven løysing **vert kjøpt inn av utbygger av leiligheiter med fleire enn 20 gebyreiningar, og overtaking føreset at det på førehand vert inngått avtale med VØR om vilkåra, jf. § 2, 3. ledd. Ved overtaking skal det gjennomførast overtakingsforretning.**

Det må berre nyttast avfallsbeholdarar tildelt/godkjent av VØR. Avfallsbeholdarane er registrert på den einkilde eigedom og skal ikkje flyttast ved endringar i eigar eller festetilhøve.

Avfallssekk er 100 liter **går ut: svarte** skal vere: **gule** sekkar merka med VØR-logo. Slike godkjende avfallssekkar kan kjøpast hjå VØR og nyttast som ekstrasekk ved avfallstoppar.

Returplastsekk er gjennomsynlege sekkar som abonnentane skal bruke til å ha rein og tørr emballasjeplast i for attvinning. VØR leverar slike sekkar ut for eit år om gongen.

Raud boks for farleg avfall er ei offentleg godkjent boks for farleg avfall, som er konstruert slik at den ikkje kan opnast av barn eller ville dyr, og kan transporterast utan krav til ADR.

f) Sortering

Bringeordning er eit kjeldesorteringssystem der abonnenten sjølv bringer sitt kjeldesorterte avfall til ein mottaksplass t.d. returpunkt eller miljøstasjon.

Henteordning er eit kjeldesorteringssystem der kjeldesortert avfall vert henta av godkjent innsamlar så nær kjelda som praktisk råd.

Kjeldesortering er når abonnenten eller annan avfallsprodusent held visse avfallstypar fråskilt og legg desse i særskilde oppsamlingseiningar eller bringer dei til tilviste mottaksstader.

Returpunkt er lokalt ubemanna oppsamlingsstad der publikum kan levere/sortere ein eller fleire avfallsfraksjonar.

Miljøstasjon/gjenbruksstasjon er eit spesielt tilrettelagt område med organisert oppsamling av separert avfall. Alle gjenvinnbare fraksjonar kan leverast på miljøstasjonen i tillegg til restavfall og farleg avfall.

***Mini gjenbruksstasjon* er eit spesielt tilrettelagt område med organisert oppsamling av separert avfall. Mini gjenbruksstasjon har tilbod om mottak av avgrensa mengde og tal fraksjonar.**

g) Slam

Tvungen slamtøming er ei ordning for tøming av slamavskiljarar og tette tankar og gjeld for alle eigedomar som har slamavskiljar eller tett tank.

h) *VØR*

VØR er Volda og Ørsta Reinhaldsverk IKS som Volda kommune og Ørsta kommune har gitt delegert ansvar i eigen selskapsavtale til å drive med innsamling, sortering og transport av avfall og slam i medhald av forureiningslova § 30, § 34 og § 83. *VØR* har eigedom retten til avfall som vert samla inn av eller til *VØR*.

§ 4. Kommunal innsamling av avfall

Kommunane har med grunnlag i forureiningslova § 30 1. ledd innført tvungen renovasjon for hushaldningsavfall. Alle eigedomar der det går føre seg aktivitet som fører til at det oppstår hushaldningsavfall, vert omfatta av tvungen renovasjonsordning. Tvungen kommunal renovasjon gjeld også for fritidseigedomar.

Ingen må samle inn hushaldningsavfall, irekna papp, papir, drikkekartong, plast og andre avfallstypar til gjenvinning, utan samtykke frå kommunane.

Det er ikkje tillate å brenne hushaldnings-, nærings-, eller farleg avfall anna enn i særskildt godkjende forbrenningsanlegg. Det er heller ikkje tillate å grave ned eller kaste hushaldningsavfall. Hageavfall og anna våtorganisk avfall kan etter avtale komposterast på eigen eigedom.

For å sikre best mogleg økonomisk, ressurs- og miljømessig handtering av avfallet, er abonnenten pliktig til å gjennomføre dei sorterings- og leveringsordningar av avfallet som *VØR* til ei kvar tid gjer vedtak om.

Det er ikkje tillate å levere risikoavfall frå helseinstitusjonar innblanda i anna hushaldnings- eller næringsavfall. Dette avfallet skal kjeldesorterast og leverast separat til godkjent mottakar t.d. godkjende handsamingsanlegg for slikt avfall ved større helseinstitusjonar eller destruksjon ved godkjende mottakarar for slikt avfall. *VØR* si innsamlingsordning vil ikkje gjelde patologisk avfall.

Med grunnlag i § 11-10 i avfallsforskrifta, tilbyr *VØR* mottak av farleg avfall frå hushaldningar. Denne fraksjonen skal leverast til dei utplasserte mottaka for slikt avfall eller miljøstasjon. Verksemdar med mindre mengder spesialavfall kan og nytte seg av den kommunale ordninga ved å levere avfallet ferdig deklarerert på miljøstasjonen.

§ 5. Avfall som ikkje er omfatta av kommunal innsamling

a. Farleg avfall frå verksemd med meir enn 1000 kg /år

b. Næringsavfall, jf. § 3 d 7. ledd.

Den som har farleg avfall og næringsavfall er eigar av avfallet, og må sjølv syte for å bringe dette avfallet til godkjent avfallsanlegg eller til anna godkjend handsaming. VØR eller kommunen vil gi opplysningar om kvar slikt avfall kan/skal leverast.

§ 6. Heimekompostering av våtorganisk avfall og hageavfall

Hageavfall bør så langt det er råd komposterast i eigen hage, alternativt leverast til miljøstasjonen.

Abonnentar med nok hageareal, får høve til å heimekompostere våtorganisk avfall og hageavfall. Kommunestyra kan i slike høve gje redusert gebyr etter nærare avtale med VØR. I avtalen vert det fastsett krav til drift av heimekomposteringa, m.a. at komposteringa skjer på ein hygienisk tilfredstillande måte, som ikkje tiltrekkjer seg skadedyr, gjev sigevatn, vond lukt eller verkar sjenerande for omgjevnadene. VØR vil gi rettleiing om drift av kompostbingen, og føre kontroll med at godkjende bingar og avtale med VØR vert fylgd. Abonnenten må skaffe seg kompostbinge for eiga rekning.

Ved brot på vilkåra i avtalen, kan VØR seie han opp og påleggje abonnenten å levere avfallet i samsvar med § 4 og § 12 i denne forskrift.

§ 7. Oppsamlingseining og plasseringa av denne

a) Oppsamlingseininga

Oppsamlingseining er den til ei kvar tid godkjende avfallsbeholdar/sekk for innsamling av hushaldningsavfall utlevert av VØR. Abonnenten/brukar er pålagt å notere nummeret på oppsamlingseininga og opplyse om dette når han tek kontakt med VØR i høve avfallsordningane.

Abonnenten er ansvarleg for reinhald av behaldarane. Behaldarane skal berre nyttast til avfallshandtering i samsvar med denne forskrifta. Ved annan bruk av behaldarane enn avfall i samsvar med denne forskrifta, er VØR utan ansvar for skade eller tap av innhaldet. Ved misbruk/aktløyse som skadar behaldaren skal abonnenten betale kostnaden med ny behaldar. Ved kjeldesortering av avfall til materialgjenvinning kan VØR dele ut fleire avfallsbeholdarar til same abonnent.

For rekkjehus, blokker, seksjonerte eigedomar, fritidshus, burettslag og liknande kan desse bruke felles behaldar eller nedgraven container. Reinhald, framsetting m.m. er desse brukarane sitt ansvar. Reinhald av fellescontainerar for fritidshus og nedgravne anlegg er VØR sitt ansvar. Reinhald og snørydding rundt nedgravde anlegg er brukarane sitt ansvar.

Abonnenten/brukar pliktar å setje rett avfallsbeholdar fram til hentestad innan kl. 06.00 på tømmedagen for å ha krav på innsamling. VØR driv innsamling mellom kl. 06.00

og 22.00. Abonnementen/brukaren er ansvarleg for at avfallsbeholdaren ikkje valdar skade ved at han kjem på avvegar frå oppstillingsplass eller hentestad.

Abonnementen/brukaren skal bringe avfallsbeholdaren tilbake frå hentestad til oppstillingsplass same dag som den er tømt.

Abonnementen/brukaren er ansvarleg for at behaldaren vert handsama med varsemd og halden rein i samsvar med krav frå helseansvarlege myndigheiter. Hushaldningsavfallet skal vere emballert t.d. i plastnett før det blir plassert i avfallsdunken.

Alt avfall som vert sett fram for tømning skal liggje i godkjent oppsamlingseining som ikkje er fylt meir enn at loket kan latast heilt tett til. Dette for at hygieniske ulemper ikkje skal oppstå. Avfallet må ikkje pakkast fastare enn at behaldaren lett kan tømast. På vinterstid er brukaren ansvarleg for at avfallet ikkje er frose fast og dermed ikkje let seg tømme.

Ved avfallstoppar må abonnentane sjølv skaffe seg tilstrekkeleg kapasitet til avfallet sitt t.d. ved ekstrasekkar. Ved gjentatt overfylling av dunken, kan VØR påleggje den enkelte abonnent større avfallsdunk og dermed høgare gebyr, jf. § 12.

Når ein nyttar avfallssekk skal denne sikrast mot fuglar og dyr ved naudsynte tiltak som nett o.l. Går ut: «**Sekkar som vert framborne eller leverte til sentrale oppsamlingseiningar skal vere**» og knyta att. Vekta på sekken skal ikkje vere over 20 kg. Vekta på avfallsdunken ikkje vere over 30 kg/140 l behaldarvolum. Tap av dunk/oppsamlingseining pliktar abonnenten å melde snarast til VØR. VØR kan påleggje abonnenten å nytte alternative oppsamlingseiningar for å få til ei forsvarleg innsamling og handsaming av avfallet.

Returplastsekken skal på hentedag knytast att **og hengast på Stryk: plasserast opp i** dunken for papir og pappavfall. Styret i VØR kan vedta anna innsamling av returplastsekken for plastemballasje. Eventuell prising av ekstrasekkar vert fastsett av kommunestyret i samband med sak om gebyrregulativ.

b) Behaldarar for fritidsbustad

VØR plasserer ut felles **oppsamlingseiningar med kjeldesortering** **stryk: avfallscontainerar** og syter for naudsynt reinhald, inklusiv av hentestad og oppstillingsplass. Fritidsbustad med eigne avfallsbeholdarar vert å regulere etter § 7 a. Avfallsbeholdarar som er utplasserte og merka med fritidsbustad, skal berre nyttast av brukarar av fritidshusvære.

c) Veg/hentestad

Hentestaden skal vere ved køyreveg, og vert fastsett av VØR. På hentestad skal avfallsbeholdarane stå lett tilgjengeleg på eit flatt og fast underlag i bakkenivå fritt frå portstolpar og liknande inklusiv med fri høgde for innhenting med mekanisk arm. Avfallsbeholdarane skal på hentedag stå i ein avstand 1–3 m frå vegkant

(vegkanthenting). Tilkomsten skal vere fri for hindringar som kan gjere tøminga vanskeleg, slik som tersklar, trappetrinn, parkerte bilar osv. Der fleire dunkar står i lag skal avstanden mellom dunkane vere minst 30 cm.

Køyreveg kan vere både privat og offentleg veg. VØR har rett til å stille krav til vegstandard, vedlikehald, tilkomst og utforming av vegane som vert køyrde. Køyreveg som skal brukast i samband med renovasjonsordninga skal anten ha snuplass for stor bil, eller vere gjennomgåande, og renovasjonsbilane skal kunne køyre henterutene på ein lovleg og forsvarleg måte. Godkjend bilveg skal minst ha ei breidde på 3,0 m køyrebane, ei fri høgde på minst 4,0 m, styrke til å tole eit akseltrykk på minst 8,0 tonn og kurvatur og stigning tilsvarande vegklasse 4 i normalar for landbruksvegar. For å kome fram til avfallsdunken/avfallssekken skal vegen vere fri for hindringar for den som skal hente avfallet. Vinterstid skal tilkomsten vere rydda for snø, og om naudsynt vere sandstrødd.

Når vegen ikkje er tilfredsstillande brøytt eller den har slik teknisk standard at den i det heile tatt ikkje er køyrbar, skal abonnenten bringe avfallet fram til renovasjonsbilen, eller ta vare på avfallet på ein forsvarleg måte til neste hentedag. VØR kan i enkelttilfelle samtykkje anna plassering enn det som er nemnt ovanfor, mot eit ekstragebyr som vert fastsett i samband med årleg gebyrfastsetjing (henteavtale). Eigarar av fritidshus/hytter pliktar å levere avfallet sitt i tilviste avfallsbeholdarar som nemnt i denne paragraf punkt b.

§ 8. Sortering av avfallet

a) Hushaldningsavfall

Hushaldningsavfall skal kjeldesorteras for dei avfallsfraksjonar det er etablert innsamlings- og mottaksordningar for. Dette vert gjort for å legge til rette for best mogleg slutthandsaming av avfallet. Avfall levert til VØR kan verte manuelt kontrollert. Ved manglande eller mangelfull sortering vil renovatør ved bruk av klistrelapp eller liknande varsle om mangelen og ikkje ta avfallet med på vanleg rute.

Fuktig avfall, skarpe eller knuselege gjenstandar mv. skal vere forsvarleg innpakka for å hindre skade på renovatørane, før plassering i avfallsbeholdaren. Varm oske må avkjølast heilt før den vert emballert og lagt i behaldaren. Oske, avfall frå støvsugar o.l. må vere skikkeleg emballert for å unngå støvplage under innhenting.

Flytande avfall skal ikkje leggjast i behaldaren. I behaldaren må det vidare ikkje leggjast større metallgjenstandar, elektrisk eller elektronisk avfall, stein og jord, hageavfall og sand/grus eller bygningsavfall. I behaldaren må det heller ikkje leggjast etsande, eksplosivt eller sjølvantenneleg avfall. Farleg avfall eller problemavfall skal ikkje leggjast i behaldaren.

Brukaren kan gjerast økonomisk ansvarleg for skader på behaldar, renovasjonsbil eller på tømme plass for renovasjonsbilen som følgje av aktlaus bruk av behaldaren.

Når ein brukar avfallssekk skal den ikkje fyllast meir enn at den kan knytast att.

Avfall som er for stort eller for tungt til den vanlege innsamlingsordninga skal leverast til miljøstasjonen. Tilsvarande skal også andre typar avfall som kan gjenvinnast eller gå til ombruk og det ikkje er oppretta henteordning for, leverast til miljøstasjonen.

b) *Henteordning*

Alle abonnentar som inngår i tvungen kommunal avfallsordning skal kjeldesortere avfallet i følgjande fraksjonar og i behaldarar som følgjer **nasjonal norm for farge/emblem:**

- Våtorganisk avfall skal leverast **i behaldar for matavfall.**
- Glas og metallemballasje skal leverast **i behaldar for glas og metall emballasje.**
- Emballasjeplast skal leverast i samanknytte returplastposar **hengt på krok på behaldar for papp/ papir.**
- Papir (aviser, tidsskrift, vekeblad, reklamepapir, papp, kartong, drikkekartong) skal leverast **i behaldar for papp/ papir**
- Restavfall skal leverast i behaldar for restavfall.

Fraksjonane skal haldast skilt og leggjast i dei utleverte avfallsbeholdarane som står heime hos kvar enkelt abonnent. Det er ikkje tillate å leggje andre typar avfall i oppsamlingseininga enn det som er nemnt ovanfor. Det er ulike tømefrekvensar for desse fraksjonane. For nærare opplysningar vert det vist til eigen informasjon. Kravet til kjeldesortering gjeld ikkje husstandane i bygda Skår.

c) *Bringeordning*

Andre kjeldesorterte fraksjonar med godkjent innsamlingsordning skal bringast til returpunkt, t.d tekstilar eller miljøstasjonen (større delar av papp, ee-avfall). VØR kan gjere endringar i utval og talet på fraksjonar. Farleg avfall må leverast til farleg avfall mottak eller miljøstasjonen. Det gjeld og raud boks for farleg- og småelektrisk avfall.

Fritidsbustader kan få tilvist bruk av felles oppsamlingseiningar for avfall med kjeldesortering. Disse skal ikkje nyttast av fast busette, verksemder, utleigehytter eller private anlegg for turisme. Brot på dette vert definert som om den aktuelle abonnent/brukar har for lite behaldarvolum/for lav hentefrekvens (jf. § 7 og § 12).

§ 9. *Hygieniske krav til renovasjon*

Forskriftene byggjer på dei krav til hygienisk avfallshandtering som vert fastsett av sentrale styresmakter og helsemynde i kommunane. Gjeldande lover og forskrifter:

- Lov 24. juni 2011 nr. 30 om kommunale helse- og omsorgstjenester m.m. (helse- og omsorgstjenesteloven) og folkehelsearbeid (folkehelseloven) med kommunale helseforskrifter.
- Lov 13. mars 1981 nr. 6 om vern mot forurensninger og om avfall med forskrifter.

Helsestyresmaktene i kommunane har eit sjølvstendig ansvar for å sjå til at helseforskriftene om handtering av avfall vert fylgd.

§ 10. Avfallsgebyr

a) Abonnentar som vert omfatta av avgjerdene i denne forskrifta skal betale avfallsgebyr som vert innkravd av VØR. Ved registrering av ny abonnent eller ved endring av eksisterande abonnement, vert nytt gebyr rekna frå den første i månaden etter at endringa er meldt til VØR. Tilsvarande vert gebyret rekna fram til den siste dagen i månaden der gebyrplikta vert avslutta. Abonnentar som kjem inn under denne forskrifta pliktar straks å melde endringar i abonnementtilhøve til VØR. Likeeins pliktar ein å melde frå dersom personen ikkje står i gebyrregisteret for avfall. Blokker, rekkehus og liknande som er organisert som burettslag, kan få avgifta berekna og betalt samla. Det same gjeld for tilsvarande bustader når eigarane organiserer seg som felles rettssubjekt (eks. huseigarforeining).

b) Gebyrsatsane vert fastsett årleg av kommunestyra. Gebyret med renter og kostnader er sikra etter pantelova § 6-1. Om renteplikt og inndrivning gjeld tilsvarande reglar i lov 6. juni 1975 nr. 29 om eigedomsskatt til kommunane § 26 og § 27.

Gebyret skal dekke alle kostnader med avfallshandteringa. For dei tenestene som er pålagde og fastsette etter denne forskrifta skal abonnenten betale eit renovasjonsgebyr til VØR pr. gebyreining. Gebyr skal og betalast for tilleggstenester som henteavtale.

Vilkåret er at avfallsbeholdarane er innleverte til VØR for den perioden det vert søkt om fritak for.

c) **Gebyreiningar som står tome heile eller delar av året kan etter årleg søknad få nedsett gebyr for:**

- **Samanhengande 12 mnd: 100%**
- **Samanhengande minst 6 mnd: 50%**

d) Gebyrdifferensiering

For å fremje avfallsreduksjon, kjeldesortering og gjenvinning vedtek kommunen differensierte gebyrsatsar i samband med dei årlege gebyrvedtak. Gebyret vert fastsett på grunnlag av storleik på avfallsdunk, om abonnenten komposterer eller om abonnentar samarbeider om oppsamlingseining.

§ 11. Unntak/klager – praktisering

Vedtak som er gjort med heimel i denne forskrifta er enkeltvedtak og kan påklagast, jf Forvaltningslova §2b og Forureiningslova §85. Eventuell klage på enkeltvedtak sendast til VØR. Dersom klagen ikkje vert teken til følge, vert den sendt til styret for VØR, som gjer endeleg vedtak.

Stryk: Søknader om unntak og klager på praktiseringa av denne forskrift, kan påklagast (forvaltningslova § 2 b og forureiningslova § 85). Klagen skal sendast til det

organet som har gjort vedtaket. Dersom klagen ikkje vert teken til følgje, vert den sendt til styret for VØR, som skal gjere endeleg vedtak.

Det at ordninga ikkje vert brukt, at bruken er tungvint eller vert sett på som unødvendig eller liknande, gjev ikkje grunnlag for fritak frå ordninga eller betalingsplikta.

Søknader/klager skal vere grunngjevne og innehalde opplysningar om eigar, adresse, gards- og bruksnummer. Kommunane delegerer mynde for avgjerd av søknader/klager til styret for VØR. Styret i VØR kan delegere mynde til å ta daglege og praktiske avgjerder etter desse forskriftene til dagleg leiar.

§ 12. Sanksjoner – straff

Dersom det viser seg at ein abonnent har for lite behaldarvolum, slik at det er fare for at avfallet vert disponert i strid med forskrifta, kan VØR påleggje abonnenten det behaldarvolumet som ein finn føremålstenleg. Byte av behaldar vil skje seinast ein månad etter at skriftleg varsel er sendt frå VØR.

Dersom det viser seg at ein abonnent ikkje har meldt i frå om gebyrpliktige abonnementeiningar eller endring i gebyrplikt som medfører tillegg i gebyret, kan VØR påleggje ekstragebyr frå den datoen som abonnementeininga(ne) vart gebyrpliktig(e). Dersom dette tidspunktet ikkje kan dokumenterast, vert abonnenten automatisk pålagt gebyr frå to år før tilhøvet vart oppdaga/registret.

VØR kan påleggje abonnenten tilleggsgebyr om det syner seg at abonnenten ikkje sorterar avfallet sitt i samsvar med gjeldande sorteringsreglement, jf. § 8 i denne forskrift. Utover dette kan brot på føresegnene verte straffa med bøter, jf. forureiningslova § 79 andre ledd.

Kapittel 2. Tøming av slam frå spreidde avlaupsanlegg

§ 13. Generelt

Volda og Ørsta kommune har vedteke å nytte mobil avvatning som behandlingsmetode for kloakkslam frå slamavskiljarar med godkjent avløp. Volda kommunestyre i møte 3. mai 1990 og Ørsta kommunestyre i møte 28. mai 1990.

§ 14. Tøming av slamavskiljarar m.m.

a) Melding

Melding om når tøming vil finne stad vil verte gjeve gjennom SMS/e-post/Altinn eller på annan måte som VØR finn føremålsteneleg.

b) Frekvens på tøming av slamavskiljar

Tvungen slamtøming gjeld for alle eigedomar som har slamavskiljar eller tett tank for slam. For eigedomar med fast busetjing/heilårsbustad og med toalett tilknytt slamavskiljar, skal slamavskiljar tømast ein gong kvart andre år. Andre slamavskiljarar

skal tømast ein gong kvart fjerde år. Tette oppsamlingstankar for hus med innlagt vatn skal tømast i god tid før dei er fulle og minst ein gong kvart år. **For eigedomar utan innlagt vatn skjer tøming av tett tank annakvart år.** I særlege høve kan VØR fastsetje annan tømefrekvens enn nemnt ovanfor.

c) VØR eller den som tømmer for VØR sine plikter

Tøming skal utførast slik at den ikkje er til ulempe for nokon med omsyn til støv, lukt eller støy. Anlegget skal forlatast i lukka stand og grinder, portar og dører skal stengjast, eventuelt låsast. Renovatør skal rapportere til kommunen alle observerte avvik ved anlegget og samla mengde slamvolum.

d) Vegtilkomst til slamtank

Krav til vegtilkomst til slamtank ved tøming heile året skjer etter § 7 c i disse forskrifter og gjeld tøming med standardutstyr.

Bruk av særskilt tømemateriell og høgre gebyr, tillet vegtilkomst på sommarhalvåret bygt etter Normal for landbruksvegar, vegklasse 5, Sommarbilveg for tømmertransport utan hengar. Anlegg med vegtilkomst vegklasse 5 vil ikkje ha krav på naudtøming i vinterhalvåret.

§ 15. *Abonnenten sine plikter*

Abonnenten skal syte for at anlegga som skal tømast er lett tilgjengelege og dimensjonerte for tøming med bil. Overdekking av kumlokk og liknande med snø, is, jord, stein eller anna skal vere fjerna av abonnenten før tøminga skal gjerast. Den som tømmer anlegget har rett til å plassere naudsynt utstyr på eigedomen for å få utført tøminga. VØR vil ikkje ta på seg krav frå skade på vegar, hagar eller liknande. Dersom vegstandarden er for dårleg, må tankeigar syte for forsterkning. Jf. også krav til veg/hentestad i § 7 c.

Dersom abonnenten ikkje har klargjort tanken for tøming eller ein må tømme tankar utanom oppsett innhentingsplan, kjem gebyr for tilkøyring i tillegg til tømepreisen.

§ 16. *Avgifter ved fellesanlegg*

Kommunale og private fellesavskiljarar for fleire bustadhus, bustadfelt, verksemder, industriområdar og andre type byggjeområde eller tettstader skal tømast i samsvar med det som er oppgitt i utsleppsløyve eller når VØR vurderer at tøming må gjerast.

§ 17. *Avgift, innkreving, renter m.m.*

Abonnenten skal betale ei årleg avgift som vert innkravd av VØR. Gebyrsatsane vert fastsett årleg av kommunestyra. Gebyret med renter og kostnader er sikra etter pantelova § 6-1 om renteplikt og inndriving gjeld reglane i lov 6. juni 1975 nr. 29 og eigedomsskatt til kommunane § 26 og § 27.

§ 18. *Klage og straff*

Dette vert handsama etter § 11 og § 12 i denne forskrift.

§ 19. *Iverksetting*

Forskrifta trer i kraft frå 1. januar 20XX og erstattar forskrift 14. desember 2017 nr. 2405 for handsaming mv. av avfall og slamtøming, Volda og Ørsta kommunar, Møre og Romsdal.